



Republika e Kosovës

Republika Kosova - Republic of Kosovo

**AGJENCIA KUNDËR KORRUPSIONIT
AGENCIJA PROTIV KORUPCIJE
ANTI - CORRUPTION AGENCY**

DATË/A:	13/07/2016
REFERENC-Ë:	AKK- DPK- DPKPP-03-03/2223/16
PËR/ZA/TO:	z. Azem DURAKU Menaxher – Departamenti i Prokurimit - ATK
CC:	z. Sakip YMERI Drejtor i Përgjithshëm - ATK
NGA/OD/FROM:	Hasan PRETENI, Drejtor i Agjencisë kundër Korrupsionit
TEMA/SUBJEKAT/SUBJECT:	Opinion lidhur me tenderin: : “Furnizimi me tableta (iPad) sipas kërkesave dhe nevojave t AK-së”

I nderuar z. DURAKU

Në mbështetje të nenit 142 (par. 3) të Kushtetutës së Republikës së Kosovës, nenit 5 (par. 1, nën par. 1.1.) dhe 21 të Ligjit nr. 03/L-159 për Agjencinë kundër Korrupsionit, nenit 8 (par. 4), 9 (par. 1, nën par. 1.6), 12 (par. 2) dhe 19 (par. 1, nën par. 1.6) të Ligjit nr. 04/L-051 për Parandalimin e Konfliktit të Interesit në Ushtrimin e Funkcionit Publik, si dhe të nenit 23 të Rregullores nr. 01/2014 së Punës së Agjencisë kundër Korrupsionit, lidhur me Tenderin: “Furnizimi me tableta (iPad) sipas kërkesave dhe nevojave të AK-së” me numër prokurimi: 11600/16/007/136, Agjencia kundër Korrupsionit, ofron këtë:

OPINION

Me të cilin kërkohet nga ju si Autoritet Kontraktues që t'i ndërmerrni të gjitha veprimet e nevojshme për evitimin e shkeljeve të evidentuara në lidhje me Tenderin me titull: “Furnizimi me tableta (iPad) sipas kërkesave dhe nevojave të AK-së” me numër prokurimi: 11600/16/007/136, në mënyrë që të respektohen dispozitat përkatëse të Ligjit nr. 04-L/042 i plotësuar dhe ndryshuar me ligjin Nr. 04/L -237, ligjin Nr. 05/L-068 dhe ligjin Nr. 05/L-092

A r s y e t i m

Ju si zyre e prokurimit pranë autoriteti kontraktues Administrata Tatimore e Kosovës keni iniciuar Procedurën e Prokurimit me titull: “Furnizimi me tableta (iPad) sipas kërkesave dhe nevojave të AK-së” me numër prokurimi: 11600/16/007/136, e cila është publikuar në faqen elektronike të Komisionit Rregullativ të Prokurimit Publik më datë 30/06/2016. Për këtë aktivitet të prokurimit keni paraparë procedurë kuotim çmimi.

Agjencia Kundër Korrupsion ka identifikuar këtë aktivitet të prokurimit si lëndë për trajtim. Gjatë shqyrtimit të dokumentacionit në dispozicion për këtë procedurë të prokurimit në njoftimin për kontratë dhe dosjen e tenderit, Agjencia kundër Korrupsion ka hasur në kritere që janë në kundërshtim me ligjin në fuqi për Prokurimin Publik në Kosovës.

Në Njoftim për Kontratë dhe në Dosjen e Tenderit tek titulli i aktivitetit përmendet lloji iPad i prodhuesit APPLE. Tutje në Dosjen e Tenderit, tek specifikacioni teknik i përpiluar nga njësia e kërkesës në detaje janë të përshkruara specifikat teknike që i referohen prodhuesit APPLE, iPad mini 4 Wi-Fi + Cellular 128 GB –Space Gray. Agjencia pasi ka kontrolluar kërkesën e njësisë kërkuese dhe dosjen e këtij tenderi, konstaton se Autoriteti kontraktues ka përcaktuar prodhuesin dhe origjinën e këtyre tabletëve.

Me caktimin e emrit të prodhuesit dhe origjinës të këtyre mallrave, favorizohet prodhuesi apple dhe në të njëjtën kohë diskriminohen prodhuesit tjetër të këtyre pajisjeve. Autoriteti Kontraktues mund të kërkojë që produkti të jetë i kualitetit të lartë dhe mund t’i referohet një standardi vendor, European ose ndërkombëtar, por nuk lejohet assesit të kërkohet që origjina e këtyre pajisjeve të jetë nga ndonjë vend i caktuar si dhe nuk është e lejuar që pajisjet të kërkohen nga ndonjë prodhues i caktuar.

Përcaktimi i specifikimeve teknike që referohen në një prodhim specifik ose burim, ose një proces të veçantë, ose marka tregtare, patenta, lloje ose origjina specifike ose prodhime, është si rregull i përgjithshëm i ndaluar. Megjithatë, një referencë e tillë mund të përdoret në raste të veçanta, nëse referenca e tillë përcjellët me fjalët “ose e barasvlershme”.

Njësia kërkuese pranë Autoritetit kontraktues duhet të ketë kujdes që me rastin e formulimit të specifikimeve teknike të mos formulojë specifikime favorizuese për prodhues të caktuar e në të njëjtën kohë t’i diskriminojë operatorët tjerë ekonomik. Autoriteti kontraktues duhet t’i përpilojë specifikimet teknike në atë mënyrë që ato të jenë në përputhje me qëllimin e prokurimit dhe të drejtuara drejt sigurimit të qasjes sa më të mirë për të gjithë operatorët e interesuar ekonomik dhe tenderuesit.

Veprimet e Autoritetit Kontraktues konsiderojmë se bien ndesh me nenin 7 Barazia në trajtim dhe jo Diskriminimi, nenin 28 Specifikimet teknike të Ligjit për Prokurimin Publik Nr.04/L-042 i plotësuar dhe ndryshuar me ligjin Nr. 04/L -237, ligjin Nr. 05/L-068 dhe ligjin Nr. 05/L-092 si dhe nenin 18 pika 7 të udhëzuesit operativ të prokurimit publik.

Konsiderojmë se shkelje të tilla nuk duhet të lejohen në procedura të prokurimit, andaj Agjencia kundër Korrupsionit rekomandon anulimin e kësaj procedure të prokurimit dhe kërkon nga Autoriteti Kontraktues që t'i shmang praktikatat e tilla në të ardhmen.

Autoritetet Kontraktuese e informojnë Agjencinë për veprimet e ndërmarra.

Me respekt!